

每週經課朗誦經文(巴克禮台語漢字)2014/11/02

共同經課 - 1 約書亞記三章七節~十七節

7 耶和華對約書亞講：「對今仔日起，我欲互你佇以色列眾人的目矚前做大，互in知我及你佇啲，親像前及摩西佇啲一樣。8 你著吩咐扛約櫃的祭司講：『恁到約但水邊的時，著停腳佇約但。』」9 約書亞對以色列人講：「恁近前來，聽耶和華——恁上帝的話。」10 約書亞閣講：「對按呢恁通知，活的上帝佇恁中間，欲佇恁的頭前趕逐迦南人、赫人、希未人、比利洗人、革迦撒人、亞摩利人、耶布斯人；11 看啊，普天下的主宰的約櫃欲佇恁的頭前過去，入約但。12 恁今著對以色列支派中揀十二人，每支派一個人，13 到扛普天下的主耶和華的約櫃的祭司，in的腳倚佇約但河的水，約但河的水，就是對頂面流落來的水，欲截斷，倚起來歸堆。」14 百姓離開布棚欲過約但的時，祭司就扛約櫃佇百姓的頭前。15 （佇收成的時約但的水常常搬(pôaⁿ)過伊的岸。）扛約櫃的到約但，扛約櫃的祭司，腳一下搵著水，16 彼個對頂面流落來的水，就豎起來歸堆，相離真遠、佇撒拉但邊頭的亞當城；彼個流佇亞拉巴海，就是鹽海，許個水全然截斷。百姓就佇耶利哥的對面過去。17 扛耶和華約櫃的祭司佇約但的乾地定定倚啲，以色列眾人攏對乾地過去，直到百姓一盡過約但。

共同經課 - 2 詩篇一百零七篇一節~七節，三十三節~三十七節

1 恁著感謝耶和華，因為伊是好；因為伊的慈愛永永佇啲！2 耶和華所救贖者著講這話，就是伊對對敵手中所救贖者，3 對逐國，對東對西，對南對北，所聚集的攏著按呢講。4 in佇曠野拋荒的路漂流，尋無城通倚起，5 也枵也嘴乾，in的心神昏去。6 in就佇苦難中哀求耶和華；伊對in的患難中拯救in，7 閣導in行直的路，互in去到通倚起的城。33 伊互江河變做曠野，互水泉變做乾燥的地，34 伊互肥地變鹹的地；攏是因為倚起佇遐的人的罪惡。35 伊互曠野變做潭窟，互乾地變做水泉。36 伊互枵餓的人踎佇遐，互in會起造通倚起的城，37 閣種作田園，栽葡萄，得著所出的土產。

共同經課 - 3 帖撒羅尼迦前書二章九節~十三節

9 兄弟啊，恁記得阮的著磨及艱苦，愛免得拖累恁一人，就暝日做工，來傳上帝的福音互恁。10 恁做干證，上帝也做干證，阮對恁信的人，做人是怎樣聖潔、公義、無通嫌。11 親像恁知阮怎樣款待恁逐人，親像老父款待家己的子兒，有勸勉恁，也安慰，也干證，12 是欲互恁行代誌合佇上帝，就是召恁入伊的國及榮光的。13 所以，阮也感謝上帝無息，因為恁對阮承受所聽上帝的道理的時，恁接納伊；無掠做人的道理，就是掠做上帝的道理。實在真正是，這就是出力行佇恁信的人的中間。

共同經課 - 4 馬太福音二十三章一節~十二節

1 彼時，耶穌給眾人及伊的學生講：2 「經學士及法利賽人坐摩西的位，3 所以見若in所給恁講的，攏著行來守伊。總是莫得照in的所做來行；因為in有講，也無行。4 in用重閣擱(oh)擔的擔，縛來下佇人的肩頭頂，若是in家己毋肯用一支指頭仔振動伊。5 in一切的所做攏是欲互人看才做，因為in的佩經做卡闊，衫仔裾的鬚做卡長，6 愛筵桌裡坐大位，會堂內坐高位，7 街市裡互人請安，也互人稱呼in拉比。8 若是恁莫得互人稱做拉比，因為恁的先生是一個；恁攏是兄弟。9 佇地裡也莫得稱人做父，因為恁的父是一個，就是佇天裡的。10 也莫得互人稱做先生，因為恁的先生是一個，就是基督。11 若是恁中間做大的，欲做恁的差用。12 凡若自高的，欲互伊卑微；家己卑微的，欲高升伊。